



SRETAN DAN NEZAVISNOSTI BOSNE I HERCEGOVINE

- Svečanom sjednicom OV Jajce obilježen Dan nezavisnosti BiH
- Centralni događaj obilježavanja Dana Evrope u Jajcu
- Stipendije Općine Jajce za 204 studenta
- Jajce grad sa 30 nacionalnih spomenika

SRETAN DAN NEZAVISNOSTI BOSNE I HERCEGOVINE



-Dragi sugrađani čestitam Vam 1. mart/ožujak - Dan nezavisnosti Bosne i Hercegovine! Dan je to kada su se građani naše domovine izjasnili za nezavisnu i suverenu Bosnu i Hercegovinu i datum potvrde viševjekovnog identiteta bosanskohercegovačkog društva i države. Danas je pred svima nama obaveza i odgovornost očuvanja i jačanja države Bosne i Hercegovine i njene suverenosti i nezavisnosti. Sretan nam Dan nezavisnosti Bosne i Hercegovine, napisao je Općinski načelnik Edin Hozan.

SVEČANOM SJEDNICOM OV JAJCE OBILJEŽEN DAN NEZAVISNOSTI BIH



Intoniranjem državne himne i odavanjem počasti poginulim i palim borcima i braniteljima, u Jajcu je, u povodu obilježavanja 1. marta Dana nezavisnosti BiH, održana Svečana sjednica Općinskog vijeća Jajce.

Uz prisjećanje na 1. mart 1992. godine vijećnici Općinskog vijeća Jajce evocirali su uspomene na dan kada su se građani Bosne i Hercegovine izjasnili na referendumu za nezavisnu i suverenu BiH.

Podsjećajući na teške dane koji su uslijedili nakon međunarodnog priznanja Bosne i Hercegovine, perioda 1992-95. godine i brojnog stradanja, predsjedavajući Općinskog vijeća Jajce Ivo Šimunović naglasio je da moramo činiti sve da se takvo stanje više nikada nikome ne dogodi.

„Svjedoci smo da još uvijek se pokušava osporavati prava, osporavati suverenitet, osporavati sve što je trebalo da baštinimo kao vrijednost, jer smo država različitosti u kojoj različitost naša treba da bude bogatstvo. Nadam se da nas sve zajedno opominje žrtva koja je podnesena u ovom vremenu i oni koji su dali najviše što su mogli dati, a da mi iz te činjenice izvlačimo sebi pouku da činimo što je moguće više da gradimo dobre međunacionalne odnose, dobre odnose kao sugrađani i da unaprijedimo našu zajednicu, prvenstveno mislim na naše Jajce i u tim odnosima da budemo primjer drugima“, između ostalog istakao je predsjedavajući Općinskog vijeća Jajce Ivo Šimunović čestitajući svim građanima Jajca Dan nezavisnosti BiH.

Podsjećajući da je Dan nezavisnosti jedan od najvažnijih i najznačajnijih datuma u historiji Bosne i Hercegovine Načelnik općine Jajce Edin Hozan ukazao je i na činjenicu da se i ove godine ovaj praznik ne obilježava na području cijele domovine, izražavajući žaljenje što neke stvari u zemlji nisu puno bolje i što još uvijek jedan dio građana BiH ignoriše ovaj događaj i ne smatra ga važnim za Bosnu i Hercegovinu. Načelnik Hozan istakao je da se nada da će se ipak jednog dana i ovaj, ali i svi datumi od značaja za BiH, obilježavati na teritoriji cijele države.

„Žao mi je što u ovoj našoj zemlji nema malo više pravde koja bi, čini mi se, bila najbitnija za opšte zadovoljstvo svih naših građana. Žao mi je što se istovremeno dešavaju neke ružne stvari, iako smo juče svjedočili i nekim dobrim, pozitivnim stvarima za BiH koje se događaju na Evropskom putu zemlje i sasvim sigurno možemo očekivati, prije ili kasnije, da ćemo se naći u zajednici evropskih naroda što je već odavno naše opredjeljenje. Istovremeno smo i svjedoci nekim drugim stvarima koje nisu dobre i koje pokazuju da neke stvari u našoj zemlji nisu do kraja i dobro uređene na zadovoljstvo svih nas“ istakao je načelnik općine Jajce Edin Hozan naglašavajući da moramo biti jedinstveni i da trebamo dati svoj doprinos kako bi nam svima bilo bolje, počevši od svakog pojedinca, rukovodstva lokalne zajednice do vrha države.

„Mi u lokalnoj zajednici moramo biti na visini zadatka i odgovornosti koju imamo prema našim građanima i moramo svim snagama raditi za dobro naše lokalne zajednice i naših građana“, istakao je Načelnik Hozan upućujući čestitku građanima Jajca i cijele Bosne i Hercegovine sa željom da sljedeće važne datume i praznike dočekujemo zajedno u boljem ozračju.

Čestitku svim građanima Jajca i Bosne i Hercegovine, na Svečanoj sjednici, uputio je Ministar prostornog uređenja, građenja, zaštite okolišta, povratka i stambenih poslova SBK Amer Mrako.

Dan nezavisnosti Bosne i Hercegovine čestitali su i predsjednici klubova političkih partija u Općinskom vijeću: Smiljka Brtan u ime Kluba vijećnika koalicije „Zajedno za bolje sutra Jajcu“, Fikret Čančar u ime Kluba vijećnika SDA BiH, Mujo Nešust u ime Saveza za bolju budućnost – Fahrudin Radončić, Edina Kurt u ime SDP BiH i Ivan Jakešević u ime HDZ 1990.

Čestitku svim građanima Jajca uputio je, na svečanoj sjednici, i glavni imam Medžlisa Islamske zajednice Jajce Zehrudin-ef. Hadžić.

OBILJEŽEN DAN CIVILNE ZAŠTITE



U povodu 1. marta/ožujka Dana civilne zaštite Federacije Bosne i Hercegovine i Svjetskog dana civilne zaštite Općinski štab/stožer civilne zaštite općine Jajce upriličio je svečanu sjednicu na kojoj su dodijeljena priznanja civilne zaštite za posebne zasluge u oblasti zaštite i spašavanja ljudi i materijalnih dobara od prirodnih i drugih nesreća u Općini Jajce.

U ime Općinskog štaba/stožera civilne zaštite općine Jajce čestitku u povodu ovog značajnog datuma uputio je komandant/zapovjednik Štaba/

Stožera Ivo Šimunović.

Odlukom Općinskog štaba/stožera civilne zaštite za posebne zasluge u potrazi i pronalaženju unesrećenih osoba u rijeci Vrbas koncem maja i početkom juna 2017. godine Pismena pohvala civilne zaštite dodijeljena je:

- FUP – Ronilački tim specijalne policije - Sarajevo
- SIPA – Jedinica za specijalnu podršku – Istočno Sarajevo
- MUP RS – Specijalna antiteroristička jedinica – Banja Luka
- MUP SBK/KSB – Jedinica za specijalističku podršku – Travnik
- MUP ZDK – Specijala policijska jedinica – Zenica
- KES „Rafting klub“ – Jajce
- FUCZ – Ronilački tim – Sarajevo
- Ronilački klub „Bosna“ – Sarajevo
- Interventna spasilačka služba - Mostar

Čestitku dobitnicima priznanja uputio je, u ime Općinske službe civilne zaštite, pomoćnik Općinskog načelnika Esad Duranović zahvalivši se svim građanima Jajca koji su na bilo koji način u protekloj godini doprinijeli spašavanju ljudi i materijalnih dobara od prirodnih i drugih nesreća.

U ime dobitnika priznanja zahvalnost Općinskom štabu/stožeru Civilne zaštite općine Jajce koji je prepoznao solidarnost, dobru volju, profesionalni odnos, te uloženi trud svih policijskih agencija i organizacijskih jedinica uputio je načelnik Policijske uprave Jajce Bare Pršlja, podsjećajući na nesretni događaj i saobraćajnu nesreću koja se dogodila 21.5.2017. godine na magistralnom putu M-16 kada su trojica nesretnih mladića vozilom „Renault Clio“ sletjeli u rijeku Vrbas. Potraga za mladićima trajala je devet dana.

OSAM KORISNIKA S PODRUČJA JAJCA U OBNOVLJENIM STAMBENIM OBJEKTIMA



Sredinom marta u Jajcu su uručeni ključevi za osam korisnika čiji su stambeni objekti rekonstruirani po principu ključ u ruke u okviru Državnog projekta stambenog zbrinjavanja (DPSZ).

Riječ je povratnicima čije su stambene jedinice izgrađene/rekonstruirane u okviru Regionalnog stambenog programa – RHP koji se finansira kroz Fond za povratak u općini Jajce.

Ugovori između korisnika, Općine Jajce, Federalnog ministarstva raseljenih osoba i izbjeglica kao implementatora i Ministarstva za ljudska prava i izbjeglice BiH kao vodeće institucije u Projektu DPSZ, a u okviru realizacije pod-projekta BiH2-DPSZ koji je uspostavljen Sporazumom o grantu između Razvojne banke Vijeća Evrope i BiH u vezi s Regionalnim programom stambenog zbrinjavanja, potpisani su u maju prošle godine.

Pomoć u rekonstrukciji stambenih jedinica po sistemu „ključ u ruke“ u cilju povratka dodjeljuje se izbjeglim osobama iz Bosne i Hercegovine s ciljem osiguranja trajnih rješenja za najugroženije izbjeglice i interno raseljene osobe.

NAČELNIK HOZAN PRIMIO MLADE KOŠARKAŠKE REPREZENTATIVCE BIH



Načelnik općine Jajce Edin Hozan primio je kadetsku U-16 košarkašku reprezentaciju Bosne i Hercegovine predvođenu selektorom i prvim trenerom Admirom Prašovićem, pomoćnim trenerom Milošem Miloševićem te fizioterapeutom Azurom Mehanovićem.

Kadetska reprezentacija BiH U Jajcu je boravila na trodnevnim pripremama pred odlazak u Podgoricu na prijateljski susret s reprezentacijom Crne Gore. Domaćini mladim reprezentativcima bili su Općina Jajce i Košarkaški klub „Vodopad“ Jajce.

Načelnik Hozan pozdravio je mlade košarkaše poželjevši im mnogo sportskih uspjeha i dobre igre u nastavku takmičenja, a selektoru i upravi zahvalio što su odabrali grad Jajce za okupljanje i trening mladih reprezentativaca.

„Trudimo se na što bolji način podržati sportske kolektive u našem gradu. Već treću godinu KK „Vodopad“ Jajce domaćin je vrlo uspješnog „Košarkaškog kupa kraljevskog grada“ koji okuplja mlade košarkaše iz BiH i regiona. Mladi ljudi se kroz sport razvijaju, zdravo žive i postaju dobri ljudi, korisni svojoj sredini, zato je važno prepoznati vrijednosti ulaganja u sport. Želim vam mnogo uspjeha, i pojedinačno i u kolektivnim nastupima, a vaš zadatak je još veći jer se nalazite u timu odabranih, najboljih u našoj zemlji u svojoj generaciji“, istakao je Hozan obraćajući se mladim košarkašima i zahvalio se i trenerima na trudu koji ulažu u ove mlade ljude.

Na gostoprimstvu Općini Jajce i Košarkaškom klubu „Vodopad“ Jajce zahvalio se selektor Admir Prašović istaknuvši da je u Jajcu bilo treće okupljanje reprezentacije, nakon Sarajeva i Tuzle. Mladi košarkaši BiH nakon toga su boravili u Crnoj Gori gdje su odigrali prijateljski susret u okviru priprema za Evropsko prvenstvo B divizije koje će se održati u BiH.

„Želja nam je povratak u A diviziju i zato svaka priprema nam je posebna. Ovdje smo u Jajcu okupili mlade košarkaše, neki od njih su prvi put u reprezentaciji. Za sve njih je poseban osjećaj kada nose dres reprezentacije Bosne i Hercegovine. Uvjeren sam da će i KK „Vodopad“ svojim uspješnim radom iznjedriti buduće mlade reprezentativce. Danas ovdje sjede djeca koja treniraju i igraju u raznim klubovima, od Igokee, preko Koša, Sparsa, Slovačke Bistrice, Šampiona, Alfe, Burča, Modriče, Gena...i svi oni su tu, zajedno, na jednom putu. Siguran sam da ćemo svi zajedno ove momke gledati još dugo na košarkaškim terenima“ istakao je selektor i trener Prašović zahvaljujući se još jednom na ukazanom gostoprimstvu i u ime reprezentacije Načelniku općine Jajce Edinu Hozanu uručio dres s potpisima mladih reprezentativaca koji su boravili na okupljanju u Jajcu.

Trener KK „Vodopad“ Denis Zjajo zahvalio je Općini Jajce i Načelniku Hozanu na podršci, a kadetskoj reprezentaciji i rukovodstvu zahvalio što su jajačkim košarkašima pružili zadovoljstvo da ugoste mlade BH reprezentativce poželjevši im uspjeh u nastavku takmičenja, uz želju da iznova budu gosti KK „Vodopad“ i grada Jajca.



CENTRALNI DOGAĐAJ OBILJEŽAVANJA DANA EVROPE U JAJCU



EU info centar pri Delegaciji Evropske unije u BiH za najznačajniji događaj 2018. godine - obilježavanje Sedmice Evrope, u okviru koje se obilježava i 9. maj Dan Evrope, ove godine izabrali su Jajce kao jednu od ključnih lokacija za obilježavanje ovog događaja, saopćeno je ovo na sastanku predstavnika EU info centra s načelnikom Općine Jajce Edinom Hozanom.

Općina Jajce podržala je ovu aktivnost, a načelnik Hozan zahvalio se na odabiru Jajca za organizovanje ovog značajnog događaja.

Inače, EU info centar u Sarajevu, sa svojom mrežom EU info pointa, za cilj ima podizanje svijesti o Evropskoj uniji, njenim institucijama, politikama i programima podrške.

7. maja 2018. godine u Jajcu će biti upriličen cjelodnevni događaj u okviru kojeg će biti organizovan revijalni program kuhanja u kojem će učestvovati škole kuhanja iz cijele BiH kao i ambasade država članica EU.

Događaj će biti završen u večernjim satima, s projekcijom zastave EU na Plivskom vodopadu u Jajcu kada će se ispred vodopada, na gudačkom instrumentima izvesti Odu radosti, što će se prenositi uživo, a video klip će biti kandidovan za izazov #Ode2Joy challenge (<http://www.europanostra.org/ode.joy-challenge/>), koji je pokrenula Europa Nostra.

Jajce je odabrano za centralnu proslavu Sedmice i Dana Evrope, kao jedan od historijskih najznačajnijih i najljepših gradova u Bosni i Hercegovini.

JAJCE GRAD SA 30 NACIONALNIH SPOMENIKA



Komisija za očuvanje nacionalnih spomenika Bosne i Hercegovine, na sjednici održanoj 12. marta proglasila je pet dobara nacionalnim spomenicima Bosne i Hercegovine. Povijesno područje Nekropola sa stećcima na lokalitetu Katica u selu Bistrica, općina Jajce 30-ti je nacionalni spomenik BiH u Jajcu.

Inicijativu za pokretanje proglašenja lokaliteta Katica nacionalnim spomenikom BiH podnijelo je UG "Društvo za zaštitu kulturno-povijesnih i prirodnih vrijednosti Jajca".

Nekropola Katica ima 22 stećka, od kojih je većina s karakterističnim nišama, a nalazi se u neposrednoj blizini Crkve sv. Franje Asiškog u Bistrici.

Peticiju za nominaciju stećaka na listu nacionalnih spomenika pripremali su jajački arheolozi Mirza Kapetanović i Franjo Leovac.

PREDSTAVLJENO UDRUŽENJE 'VODOPAD LJUBAVI' NAMIJENJENO DJECI S POTEŠKOĆAMA U RAZVOJU



U salonu Doma kulture u Jajcu predstavljeno je Udruženja/Udruga "Vodopad ljubavi" koje je namijenjeno djeci s poteškoćama u razvoju.

Svečanost su uveličali Mandolinski sastav i Zbor „Nikola Šop” Hrvatskog kulturnog društva „Napredak” Jajce, djevojčice Esmā i Petra koje su recitirale, dramska skupina Srednje strukovne škole "Jajce" s igrokazom za djecu, te violinistice iz „Novog mosta“.

U ime grupe mladih ljudi koji su najzaslužniji za realizaciju ovog projekta prisutnima su se

obratili Amir Kahrīman i Franjo Leovac.

Podršku osnivanju ovog udruženja dali su i Centar za socijalni rad Jajce, Općina Jajce, učitelji, odgajatelji, direktori škola, jajački poduzetnici i mnogi drugi.

Za predsjednicu Udruženja "Vodopada ljubavi" izabrana je Dragana Samardžić koja se zahvalila svima koji su dali svoj doprinos ovom projektu.

AKCIJA NANSEN FORUMA MLADIH U JAJCU



Multietnički Nansen forum mladih graditeljica i graditelja mira iz Srednje strukovne škole Jajce zajedno sa profesoricama Tamarom i Sabinom, članicama multietničkog Nansen koordinacijskog odbora Jajce u saradnji s Crvenim križom Jajce su identifikovali tri porodice/obitelji s područja opština/općina Jajce (F BiH) i Jezero (RS).

Tom prilikom uručili su pakete hrane i higijenskih proizvoda, te napravili kolačiće i uručili ih porodicama u naselju Smionica. Još

jednom mlade i mladi iz Jajca su ukazali na važnost njegovanja odnosa između ljudi bez obzira na etničku pripadnost.

Aktivnost je dio projekta NDC Sarajevo – "Jajce, uspješna priča-Nova generacija", finansijski podržanom od strane Ambasade Savezne Republike Njemačke u Bosni i Hercegovini.

SRETAN 8. MART MEĐUNARODNI DAN ŽENA

*Sretan
Dan žena!*

„Poštovane majke, supruge, sestre, drage sugrađanke, Čestitam vam 8. mart Međunarodni Dan žena! Hvala vam što svojom ljubavlju, znanjem, energijom i razumijevanjem činite naš život sretnim. Neka vam je sretan Dan žena“ navodi se u čestitci Načelnika općine Jajce Edina Hozana upućenoj sugrađankama u povodu obilježavanja ovog značajnog datuma.

ODRŽANA RADIONICA NA TEMU ‘POLOŽAJ ŽENA OBOLJELIH OD KARCINOMA’ U JAJCU



Povodom Međunarodnog dana žena, Udruženje građana oboljelih od karcinoma dojke i drugih malignih oboljenja “NADA” Jajce, uz podršku Misije OSCE-a u Bosni i Hercegovini, organizirali su radionicu o položaju žena oboljelih od karcinoma u Jajcu. Cilj radionice bio je razmjena iskustava i podizanje svijesti o preprekama s kojima se suočavaju žene oboljele od karcinoma.


Također, učesnici su imali priliku razgovarati sa psihologom o iznalaženju načina kako se uspješno nositi s bolešću.

DIO ULICE HRVOJA VUKČIĆA HRVATINIĆA U NOVOM RUHU

Kraj mjeseca aprila bio je u znaku završetka planiranih radova na rekostrukciji dijela ulice Hrvoja Vukčića Hrvatinića.

U prvoj fazi Projekta rehabilitacije kolovoznih površina i uređenja saobraćajnica ulica Hrvoja Vukčića Hrvatinića i ZAVNOBiH-a obuhvaćen je dio ulice na potezu od zgrade Javnog komunalnog preduzeća do zgrade Privredne banke.

Završeni su radove na rekonstrukciji vodovodne i kanalizacione mreže, postavljena je nove LED rasvjeta, uređena pješačka zona i asfaltiran kolovoz. Vrijednost ugovorenih radova prve faze iznosila je 391.378,49 KM. Izvođač radova bila je firma BH4 d.o.o. Jajce.



STIPENDIJE OPĆINE JAJCE ZA 204 STUDENTA



April je bio u znaku i svečanog potpisivanja ugovora o stipendiranju studenata koji su po Konkursu Općine Jajce ostvarili pravo na stipendiju za školsku 2017/2018. godinu. Ugovore o stipendiranju sa studentima potpisao je Načelnik Općine Jajce Edin Hozan. Stipendiju u iznosu od po 100,00 KM mjesečno za deset školskih mjeseci, ostvarila su ukupno 204 studenta koji studiraju na jednom od fakulteta na Univerzitetima u Bosni i Hercegovini, ali i izvan granica naše zemlje, u Beču, Splitu, Zagrebu, Rijeci, Istanbulu.

Trinaestu godinu za redom iz Budžeta Općine Jajce izdvajaju se sredstva za stipendiranje dobrih i uspješnih studenata s područja općine Jajce. Do sada je, u dvanaest godina, za stipendiranje đaka i studenata iz budžeta Općine Jajce izdvojeno više od 1.700.000,00 KM.

Pravo na stipendiju po osnovu ocjena ostvarili su i učenici generacije, studenti prve godine, a Općina Jajce posebno je ponosna na studente koji kontinuirano, iz godine u godinu ostvaruju visok prosjek ocjena.

Uz iskrene čestitke stipendistima i roditeljima studenata, Načelnik Općine Jajce Edin Hozan, istakao je da je danas posebno sretan:

„Ovo mi je jedan od dražih i važnijih događaja, jer je obrazovanje i sticanje znanja najvažnije. Meni je zadovoljstvo da na ovaj način Općina Jajce može pomoći našoj djeci da lakše prođu kroz period studiranja. Čestitam svima vama, posebno našim studentima koji se trude i ostvaruju dobre rezultate. Ono što najviše želim jeste da većina naše djece ostane u Bosni i Hercegovini i ovdje u Jajcu i svojim znanjem pomognu u razvoju naše zemlje i našeg grada“, naglasio je načelnik Hozan i mladim Jajčanima, budućim ljekarima, inženjerima, pravnicima, arhitektima, profesorima, ekonomistima, novinarima, sociolozima, nastavnicim, te poželio uspjeh u nastavku školovanja.

Između 204 stipendista su i oni s visokim prosjekom ocjena: Ćosić Sara studentica II godine medicine Medicinskog fakulteta u Banja Luci s prosjekom ocjena 9,33, Dervišić Belma studentica II godine na Filozofskom fakultetu u Banja Luci, prosjek ocjena 8,91, Tatarević Alisa studentica III godine zdravstvene njege s prosjekom 8,71 na Medicinskom fakultetu u Banja Luci, student III godine Meštrovac Alem s prosjekom ocjena 8,69 na Medicinskom fakultetu Sarajevo, Čavar Amanda studentica IV godine na Fakultetu kemijskog inženjerstva i tehnologije s prosjekom ocjena 4,7, Dizdar Amra studentica IV godine Islamskog pedagoškog fakulteta u Zenici, smijer Socijalna pedagogija sa prosjekom ocjena 8,6, student V godine Medicinskog fakulteta u Zagrebu Križanac Stefan s prosjekom ocjena 8,31, Ladan Maja, prosjek 8,14, studentica V godine na Fakultetu prirodno-matematičkih i odgojnih znanosti Mostar i studentice VI godine medicine Duranović Minela, Medicinski fakultet Tuzla i Rajić Katarina, Medicinski fakultet Split.

Pravo na stipendiju po osnovu ocjena ostvarili su i učenici generacije, studenti prve godine: Crnoja Katarina, Burić Matea, Ladan Paola, Glavaš Josip, te Duranović Harisa i Ljubez Antea, učenice s prosjekom 5,0.

Općina Jajce jedna je od rijetkih općina u Bosni i Hercegovini koja svojim stipendistima, po potpisivanju ugovora, uplati stipendiju u cjelokupnom iznosu od po 1.000,00 KM.



PRIZNANJE POČASNI GRAĐANIN URUČENO DOKTORU BENU



Na Svečanoj sjednici Općinskog vijeća Jajce upriličenoj u povodu Dana općine Počasnim građaninom Jajca proglašen je dr. Benjamin Alfred Markin, Jajčanima poznatiji kao dr. Ben. Zbog bolesti dr. Ben nije prisustvovao svečanosti, ali je sredinom mjeseca aprila posjetio svoje Jajce i tom prilikom su mu Načelnik Općine Jajce Edin Hozan i predsjedavajući Općinskog vijeća Jajce Ivo Šimunović uručili priznanje Počasni građanin općine Jajce.

BESPLATAN MAMOGRAFSKI PREGLED



Povodom Dana zdravlja, u mjesnom području Kruščica, u organizaciji Udruženja oboljelih od karcinoma „Nada“ i uz podršku Američke ambasade u Sarajevu, JZU Dom zdravlja Jajce i JU Centar za socijalni rad Jajce obavljena su 52 mamografska pregleda, te organizovano mjerenje krvnog pritiska i šećera u krvi.

U povodu obilježavanja Dana zdravlja održano je i predavanje dr. Ajle Hrnjić na temu „Prevenција i samopregled dojki“.

ODRŽANA IZVJEŠTAJNA SKUPŠTINA DRUŠTVA ZA ZAŠTITU KULTURNO-POVIJESNIH I PRIRODNIH VRIJEDNOSTI JAJCA



Društvo za zaštitu kulturno-povijesnih prirodnih vrijednosti Jajca već treću godinu radi na izradi Registra kulturnih i prirodnih dobara Jajca. Do sada je prikupljeno i sistematizirano više stotina podataka o kulturnim i prirodnim dobrima, napravljeno oko 2.000 fotografija, izrađena je bibliografija Jajca sa preko 360 naslova i kronika Jajca koja ima blizu 3.000 hronološki poredanih podataka o Jajca. Obraden je prostor svih 27 mjesnih zajednica sa 61 nase-

ljenim mjestom.

Na osnovu peticije Društva ove godine je nekropola stećaka u Gaju, Bistrica proglašena nacionalnim spomenikom BiH.

U JAJCU ZAVRŠENO SNIMANJE PRVOG BOSANSKOHERCEGOVAČKOG HOROR FILMA



„Jezero“ je naziv drugog igranog filmskog projekta Timura Makarevića. Nakon festivalskog života prvijenca “Ništa, samo vjetar”, čiji se početak kino distribucije očekuje u BiH, Makarević je pristupio radu na drugom filmu, različitih tematskih, strukturalnih i žanrovskih odlika.

Ujedno je riječ o prvom horor filmu jednog autora iz BiH, te prvom poslijeratnom filmu, s radnjom smještenom u srednjobosanskom gradu Jajcu.

Uloge u filmu tumače Maja Zećo, Boris Ler, Nadine Mičić, Emir Fejzić, Leon Lučev, Jelena Graovac, Jasenko Pašić i Ena Avdović.

Ekipu čine još i direktor fotografije Vedran Rupić, dizajnerka produkcije Emina Kujundžić, izvršni producent Ida Makarević i rukovodilac produkcije Adnan Beširević Beško, dok će postprodukciju zvuka raditi Igor Čamo.

Film se radi u koprodukciji produkcijske kuće SCCA/pro.ba iz Bosne i Hercegovine, BARKA Media iz Austrije i produkcijske kuće Business Club Royale iz Švedske.

Producenti filma su Vedran Rupić, Timur Makarević, Igor Bararon i Amra Bakšić Čamo.

Film su podržali Auto kamp Plivsko jezero – Jajce Tours i Općina Jajce.



DAN PLANETE ZEMLJE JAJČANI DOSTOJNO OBILJEŽILI




U povodu 22. aprila Dana planete Zemlje Općina Jajce u saradnji s nevladinim organizacijama, sportskim kolektivima, javnim ustanovama i građanima organizovala je još jedn veliku akciju uređenja obala rijeke Plive i gradskog parka. U akciji je učestvovao veliki broj članova iz različitih udruženja i sportskih klubova iz našeg grada. Posebno treba naglasiti da je većina učesnika bila mlađa od 18 godina.

Akciji su se odazvali: SRU „Zlatovčica“, Rukometni klub Jajce, KUD Jajce, NK Metalleghe BSI, OK „Dijamant“, Ženski odbojkaški klub „Nansen-Jajce“, Društvo za zaštitu povijesnih i prirodnih vrijednosti, MK „Padrino“, KK „Vodopad“, volonteri Crvenog križa, Rafting klub Jajce, Omladinski centar, Klub prijatelja prirode Jajce i PD „Ćusine“.

Pohvale zaslužuje i Šumarija Jajce čiji su radnici uredili jedno od najkvalitetnijih izvorišta pitke vode u mjestu Brišići. Postavljeno je drveno korito i klupe za odmor. JKP „Čistoća i zelenilo“ se pobrinulo da prikupljeni otpad bude uklonjen na odgovarajuću deponiju.

Akciju su, uz Općinu Jajce, podržali i Agencije za kulturno povijesnu i prirodnu baštinu i porodica Borislava Kresojevića iz Švedske.

JAJCE NA FOTOGRAFIJAMA



GRADOVI PARTNERI

PIACENZA - Italija <http://www.comune.piacenza.it/>

ALAÇATI – Turska

HALLSBERG – Švedska <http://www.hallsberg.se/>

OTTENSHEIM – Austrija <http://www.ottensheim.ooe.gv.at/system/web/default.aspx>

VIROVITICA – Hrvatska <http://www.virovitica.hr/>

ZENICA – BiH <http://www.zenica.ba/>

TOMISLAVGRAD BiH - <http://www.tomislavgrad.gov.ba>

SZEKSZARD - Mađarska - <http://szekszard.hu/>

KUTNÁ HORA - Češka - <http://www.kutnahora.cz/>

BILTEN OPĆINE JAJCE

Općina Jajce u saradnji s nezavisnim portalom Jajce Online priprema mjesečni Informativni bilten Općine Jajce koji ćete u elektronskoj formi moći prelistati svaki mjesec.

U Biltenu će biti sumirane mjesečne aktivnosti, tekstovi i fotografije koje ste možda preskočili pročitati, a zaslužuju Vašu pažnju.

Također, u Biltenu ćemo najaviti i događaje za naredni mjesec. Pred vama je deseto izdanje Informativnog biltena Općine Jajce.

